

## FESTA SAGRADA FAMÍLIA – TINAN C

### Tema ba Festa Sagrada Família nian

Leitura sira domingu ne'e nian komplementa malu bainhira apresenta koordenada fundamentál rua atu harii família sarani ida: domin ba Maromak no domin ba ema sira, liuliu sira ne'ebé besik liu ita – aman-inan no familiár sira seluk.

*Evanjellu* subliña, liuliu, dimensaun domin ba Maromak: Maromak nia projetu tenke sai prioridade ba sarani hotu, eziénsia fundamentál, iha ne'ebé sira seluk tenke submete bá. Família sarani hari'i iha respeitu absolutu ba projetu ne'ebé Maromak iha ba ema ida-idak.

*Leitura daruak* subliña dimensaun domin ne'ebé tenke suli husi ema hotu nia jestu sira, sira ne'ebé moris “iha Kristu” no simu atu sai Ema Foun. Domin ida-ne'e tenke to'o, ho forma espesiál, ba sira hotu ne'ebé fahe ho ita espasu familiár no tenke tradús iha atitude sira komprensaun nian, laran-di'ak nian, respeitu nian, partilla nian, servisu nian.

*Leitura dahuluk* apresenta, ho forma prátika tebes, atitude ruma ne'ebé oan sira tenke iha hasoru inan-aman sira. Ne'e mak forma ida atu konkretiza domin ne'ebé leitura daruak fó sai.

### LEITURA I – Sir 3,3-7.14-17a (gr. 2-6.12-14)

Livru Ben-Sira (hanaran mós “Eclesiástico”), husi ne'ebé foti leitura dahuluk, mak livru sapiensiál ida no, hanesan livru sapiensiál hotu, hakarak apresenta reflesaun ida ho karáker prátika kona-ba arte moris di'ak no arte haksolok nian. Iha inísiu sékulu II mK, iha época ida iha ne'ebé elenizmu hahú ninia influénsia, katak sai perigu ba kultura no valór tradisionál Israel nian. Jezús Ben-Sira, autór livru ne'e nian, fó hanoin israelita sira atu keta lakon identidade kulturál no relijioza Povu nian. Nune'e, nia buka apresenta sínteze ida relijiaun tradisionál no sabedouria Israel nian, hodi subliña valór judaiku sira nia grandeza no hatudu katak kultura judaika la'ós menus liu fali kultura grega.

### MENSAJEN

Testu apresenta indikasaun prátika ruma ne'ebé oan sira tenke toma konta iha sira-nia relasaun ho aman-inan sira.

Liafuan ida be sai maka'as: “onra”. Nia lori ita ba dekálogo Sinai nain(kf. Ex 20,12), iha-ne'ebé mosu sentidu “fó glória” nian. “Fó glória” ba ema ida katak fó importánsia tomak ba nia: “fó glória ba aman-inan” katak, rekoñese sira-nia importánsia nu'udar Maromak nia instrumentu, moris nia hun.

Rekoñese katak inan-aman mak hun, husi ne'ebé Maromak haraik moris mai ita, tenke lori ba gratidaun; no gratidaun iha konsekuénsia iha nivel prátiku. Implika tau matan ba sira bainhira sira sai ferik no katuas no la despreza ka abandona sira; implika asiste sira materialmente – hodi la inventa deskulpa/razaun ruma – bainhira sira la bele ona serbisu (kf. Mc 7,10-11); implika la halo buat ruma ne'ebé fó laran triste ba sira; implika rona sira, hanoin no halo tuir sira-nia orientasaun no konsellu sira; implika sai laran-sadia ho limitasaun sira ne'ebé idade/otas lori mai. Haree ba kontestu tempu ne'ebé Ben-Sira hakerek, iha indikasaun sira kona-ba oan sira ni laran,

soi mós preokupasaun atu mantein moris nafatin valór tradisionál sira, valór sira ne'ebé ema katuas sira rai didi'ak no tranzmite ba foin-sa'e sira.

Nu'udar rekompensa ba atitude “onra” inan-aman sira, Jezús Ben-Sira promete perdaun ba salan sira, ksolok, vida naruk no Maromak nia atensaun.

## **LEITURA II – Col 3,12-21**

Paulo dadur hela (parese iha Roma, tinan 61/63) bainhira hakerek ba kolosense sira. Tempu ruma antes Paulo simu notísia ladún di'ak kona-ba comunidade Kolossos nian. Notísia sira ko'alia kona-ba tendénsia doutór lokál ruma ne'ebé hanorin doutrina laloos no hadook kolosense sira husi lialoos Evanjellu nian.

Paulo afirma katak Kristu mak Makso'ik mesak no Nia iha fatin aas liu iha kriaun no salvasaun ema sira nian.

Testu leitura daruak nian mak parte daruak surat nian, kontinuasaun husi parte dahuluk ne'ebé haktuir Kristu nia supremasia iha kriaun no redensaun. Paulo fó hanoin ba kolosense sira katak uniaun ho Kristu lori konsekuénsia iha nivel moris prátika nian: implika hakribi “ema tuan” egoísmu no salan nian, no “hatais ema foun”.

### *MENSAJEN*

Iha termu konkretu liu, moris nu'udar “ema foun” implika kuda virtude lubuk ida ne'ebé mai husi sarani nia uniaun ho Kristu: laran-sadia, laran-di'ak, haraik-an, pasiénsia, laran-maus. Fatin espesiál fó ba perdaun ba maluk sira nia salan, hodi banati tuir Kristu. Virtude sira-ne'e mak eziénsia no manifestasaun karidade nian, nu'udar ukun-fuan fundamentál liu moris sarani nian. Katálogo/lista virtude nian ne'e hetan mós iha étika gregu sira-nian; buat foun iha ne'e mak ninia fundamentasaun: eziénsia sira-ne'e mai husi relasaun íntima sarani ida nian ho Kristu; moris “iha Kristu” implika moris, hanesan Nia, iha domin totál, iha serbisu, iha disponibilidade no iha don moris nian.

Aprezenta tiha ideál moris sarani iha ninia liña jerál sira, Paulo aplika buat ne'ebé nia foin hateten ba vida familiár. Ba feen sira, nia hameno respeitu ba sira-nia la'en; ba la'en sira, nia konvida atu hadomi sira-nia feen, hodi evita domíniu ka hanehan sira; ba oan sira, nia rekomenda obediénsia ba aman-inan sira; ba aman-inan sira, ho intuisaun pedagójika, nia husu atu keta hatodan maka'as oan sira, basá ida-ne'e bele impede dezvoltamentu normál ba sira-nia kapasidade.

Ho forma ida-ne'e, iha espasu familiár, nia manifesta Ema Foun, ema ida ne'ebé moris tuir Kristu.

## **EVANJELLU – Lc 2,41-52**

Evanjellu ne'ebé ohin propoin mai ita mak finál “Evanjellu infánsia” Lucas nian. Ita atene ona katak :Evanjellu infánsia” nia finalidade la'ós halo reportajen ida kona-ba tinan dahuluk sira Jezús nia vida nian, maibé katekeze ida kona-ba Jezús; iha katekeze ne'e, hateten sé mak Jezús no apresenta koordinada teolójika ruma ne'ebé dezenvolve tuirmai iha Evanjellu laran. “Katekeze” ohin nian situa ita iha Jerusalém. Lei judaika husu atu ema sira Israel nian bá

Jerusalém tinan ida dala tolu, durante festa boot tolu peregrinasaun nian (Páskua, Pentekostes no FestaTaka-baluk sira-nian– kf. Ex 23,17-17). Maski rabinu sira la konsidera obrigatória lei ne'e to'o tinan sanulu-resin-tolu, aman-inan barak lori sira-nia oan-mane sira molok tinan ne'e. Jezús iha tinan sanulu-resin-rua no, tuir testu Lucas nian, nia bá ho Maria no José iha Jerusalém atu selebra Páskua.

Iha ambiente Jerusalém no Templu nian mak Lucas fó sai Jezús nia liafuan dahuluk sira iha Evanjellu. Liafuan sira-ne'e mak konserteza sentru ba ita-nia relatu.

### *MENSAJEN*

Xave ba epizódiu ida-ne'e mak liafuan sira ne'ebé Jezús dehan sai bainhira hasoru malu ho Maria no José: “tansá imi buka Ha'u? Imi la hatene katak Ha'u sei horik iha Ha'u aman nia uma?”

Signifikadu (katekeze) resposta nian ba lia-husun Maria nian mak Maromak mak Jezús nia Aman loos. Husi ne'e ita bele hasai konkluziun katak Maromak nia eziénsia, ba Jezús, mak prioridade fundamentál, ne'ebé boot liu eziénsia seluk. Ninia misaun – misaun ne'ebé Aman konfia ba Nia – obriga Nia atu hakotu Italin sira ho família rasik (kf. Mc 3,31-35).

Posivel mós katak iha ne'e, iha referénsia ida ba paixaun, mate no moris-hi'as Jezús nian: epizódiu ida ohin nian, nune'e mós faktu sira liga ho Jezús nia paixaun, mate no moris-hi'as, situa iha kontestu paskál ida; iha situasaun rua hotu Jezús abandonadu hela – iha ne'e Maria no José husik nia mesak no, ikusmai, eskolante sira – ema sira ne'ebé la komprende katak ninia prioridade mak Aman nia projetu; situasaun rua hotu, ema buka Jezús (kf. Lc 24,5) no Nia tenke esplika katak nia moris nia finalidade mak kumpre buat ne'ebé nia Aman define ona (kf. Lc 24,7.25-27.45-46). Lucas apresenta iha-ne'e xave atu komprende Jezús nia moris tomak: Nia mai mundu tanba Aman Maromak nia mandatu no ho projetu ida salvasaun/libertasaun nian. Ba sira ne'ebé husu tansá Mesias tenke tuir dalan determinadu ida, Lucas hatán: tanba ne'e mak Aman nia hakaran. Atu kumpre Aman nia hakaran mak Jezús mai hasoru ita no tama iha ita-nia istória.

Ita nota tan kestaun rua ne'ebé bele serve ba ita-nia reflesaun no edifikasaun: uluknanai, ita haree entuziazmu ne'ebé Jezús iha ba Maromak nia Liafuan no ba kestaun sira mai husi nia; hafoin, Jezús nia “deklarasaun independénsia” nian bele tulun ita atu komprende katak família la'ós fatin taka metin ida, iha-ne'ebé ema buras iha orizonte limitadu, maibé nia mak fatin atu ita loke an ba mundu no ba maun-alin sira, iha-ne'ebé ita prepara an atu bá hasoru mundu ne'ebé hale'u ita hodi konkista nia.